

9. Maj 2016

Inuit amerliartuinnartut Nunarput qimassallugu aalajangertarnerannut suut tunngaviler-suutaasinnaaneranik innuttaasullu ikiliartuinnarnerat mumisinnissaanut suut iliuuserineqarsinnaanerannik Naalakkersuisut UKA2017-mut saqqummiunneqartussamik sukumiisumik nalunaarusiornissaannik Inatsisartunut aalajangiiffissatut siunner-suut.

(Inatsisartunut ilaasortaqa Sara Olsvig, Inuit Ataqatigiit)

Qulaani pineqartumut Siumumiit imaattumik oqaaseqassuugut.

Siullermik Siumumiit oqaatigissuarput inuit nuuttariaqalernerminnik sumuugaluartorluunniit aalajangertarnerat ataqquilluinnaratsigu. Nuuttariaqalernerminni aalajangernerit sorpassuarnik peqquteqarsinnaanerata ilisimagatsigu.

Taamatut oqarneq imatut paasineqassanngilaq nunatsinniik aallartartut amerligaluttuinnartut sumik peqquteqarnera paaserusunnginnatsigu.

Taamaattuusorinninneq aallaavigalugu oqallissinnaagunaqaagut kisianni aamma sooq nuttarnerup taamma annertuginera sunik pissuteqartoq eqqoriaanerunngittumik ilisimasaqarfīgigunarparput.

Aaqqissugaanerput qivianngittoorsinnaanngilarput, minnerunngittumillu nunatta inuuniarfigineqarsinnaanerata pikkunartuunera aamma qivianngittuugassaanani. Ilisimavarput peqqissutsikkut peqquteqartumik inuppassuaqartoq nunami angallavikkuminarnerusumi periarfissarissaarfiunerusutullu taaneqarsinnaasumi kialaarnerusumillu silaannartalimmi najugaqarusuttut Danmarkimut nuuttartut ikittuunngittut.

Tusartuaannalernikuuarputtaaq soraarninngornermi soraarnerussutisiaqalernermi atugassarititaa-sut nunatsinni pitsaannginnerummata nunatta qimannissaanik aalajangertoqartartoq. Kisianni aamma amerlaqaat ilaqutaqarnertik ilaqutaqalersimanertilluunniit pissutigalugu Danmarkimut nuuttartut.

Ajoraluartumillu aamma isertuutissanngilarput ilaqutariit oqinnerusumik inuuneqarsinnaanissamik takorluugaqarlutik Danmarkimut nuuttartut akulikilligaluttuinnarpasimmata.

Tamakku saniasigut ilinniagaqartut eqqarsaatigalungit ilinniakkamik naamassinnittartut ilaatigut naamassinerminni uniinartariaqartarput ilaqutaqalersimanertik pissutigalungu. Taamaakkaluartoq Siumumiit isumaqarpugut ilinniagaqartunut tungatillugu pitsaaneruseqarqutut aqutissiuusisariaqartugut nunatsinnut uternissaannik siunertaqartumik. Kalaaleqatigut ilinniarluarsimasut atorfissaqarteqaagut. Kalaaleqatitta ilinniareerlutik nunatsinnut uternissaminnut soorunami suliffeqalersinnaanertik qulakkeerusuttarpat. Utinngittoortarneq atorfininngittoortarnermik peqquteqarsimappat atorfinititseriaaserput nalilersugassanut ilaatittariaqarippat isumaqarpugut.

Aalajagiifigisassatut siunnersuut qulaani taaneqartoq uka 2017-mi saqqummiussinissamik siunnersuut imalik ilassilluarparput. Akissuteqaammili Naalakkersuisut misissuinernik aallartitsereersimammata Naalakkersuisut allanguutissatut siunersuutaat Siumumiit taparserparput.

Taamatut oqaaseqarluta siunnersut aapassaaneerseqartinnani ataatsimiititaliami sussassaqartumi suliarineqarnissaa innersuupparput.

Jess Svane

Siumut